





3-6

津田文庫  
文庫 1  
1521  
21





010190608757

龍威秘書三集

歷代詩話八種

第六冊

蓮坡詩話

國朝  
查為仁

龍威秘書三集六冊目

大酉山房



僕少遭憂患放棄以後酷嗜聲詩凡從遊先輩及  
 石交襟契所有贈畲倡酬之作必加甄錄用備遺忘  
 今年春二月人事少暇搜諸篋衍共得若干條稍加  
 詮次釐成三卷題曰蓮坡詩話若方外閨秀雜流之  
 句亦附入焉回憶三十年來酒邊燭外論議所及足  
 以資暇啟顏者正復不少并為述其顛末以助談柄  
 蓋是書得於見者七八得于聞者二三也嗟乎僕無  
 名世之心兼少傳後之志視枯筆禿猶復孜孜不已  
 者詎結習之難忘寔敦交之竊取若云翁張風雅軒

蓮坡詩話  
輕人才則非僕之所敢出也乾隆六年二月蓮坡居士查爲仁自題

蓮坡詩話序

詩話之作其肇於大小序乎。作詩之旨非序不彰。說詩之道廢序則鑿。後世衍其流者有二。清能靈解標舉雋異。主客圖是也。是謂傳其詩。歡場醉地。感均頑艷。本事詩是也。是謂傳其人。吾友查君蓮坡。少遭憂患。壹意聲詩。推衿送抱。倡酬日衍。目濡耳染。聞見日拓。出子墨之緒。餘溢爲詩話。是殆能兼張爲孟啟之長者。余反覆觀之。歎君之用意厚也。昔嚴有翼以雌黃著號。葛立方以陽秋立名。持律嚴矣。然嫌其專以

倚。撫。疵。病。爲。能。失。溫。柔。敦。厚。之。旨。君。獨。宏。獎。陳。人。激。揚。氣。類。如。人。天。集。會。有。讚。歎。而。無。撓。訶。不。旣。善。乎。嗟。乎。大。江。南。北。詩。人。如。艸。蔡。不。擇。地。而。生。而。名。章。秀。句。會。不。掛。於。通。貴。者。之。口。不。謂。匿。跡。菰。蘆。者。甄。綜。遺。事。轉。能。囊。括。一。代。之。騷。雅。試。瞻。海。寫。苟。非。橫。目。四。足。以。靈。性。相。照。喻。者。其。孰。不。願。暱。就。焉。余。才。薄。不。足。以。開。設。壇。坫。而。緇。衣。之。好。自。謂。不。後。於。蓮。坡。讀。是。編。已。自。憙。乎。抑。自。慙。也。乾。隆。辛。酉。年。春。三。月。葦。浦。弟。杭。世。駿。

蔗塘外集

蓮坡詩話上

宛平 查爲仁 心穀

宗室紅蘭主人岳端嘗自製揚州夢傳奇遍招日下諸名流賞之會者百餘人內有少年王生善集唐卽席詩成結句云十年一覺揚州夢唱出君王自製詞主人大喜以黃金十四錠白玉卮三奉酒爲壽曰一字一金也生飲酒受金卽以金分給梨園十四人曰同沾君惠是日主賓歡洽轟飲而散主人又號玉池

生善畫嘗有句云萋萋滿地王孫草漠漠一天神女  
雲又號東風居士因有東風無力不飛花句為輔國  
將軍博問亭爾都所賞也

周宮詹起渭有西湖詩云天邊明月光難並人世西  
湖景不同若把西湖比明月湖心亭似廣寒宮較東  
坡進一格

錢振芝尚濠有詠馬嵬詩云長生殿上祝姻嫁馬首  
紅羅不暫憐自是薄情渾說謊不因無策庇嬋娟與  
李義山君王若道能傾國玉輦何由過馬嵬之句各

臻其妙

雪嶠大師圓信又號雪獅子結茅徑山中獨居一菴  
自書聯曰孤雲臥此中萬山拜其下嘗有句云千林  
萬林楓葉乾七灣八灣秋水老山猿敲石下危巖惡  
虎啣柴入荒艸又有句云殘雪枝頭午未消熟眠老  
虎始伸腰又有句云簾捲春風啼曉鴉閒情無過是  
吾家青山箇箇伸頭看看我菴中吃苦茶出筆奇峭  
絕無蔬筍氣師於順治丁亥八月廿六日書訣衆渴  
曰小兒曹生死路上好逍遙皎月冰霜曉喫杯茶坐

脫去了命侍者進茶飲畢而逝

沛縣間古古爾梅號白奔山人赴史道隣閣部聘時  
值興平伯高傑新為許定國所殺古古勸閣部往鎮  
撫之閣部勿聽且退保維揚古古遂以書投之而去  
後於廬州見傳奇有史閣部勤王一闕感而志之云  
元戎親師五諸侯不肯西征據上遊今夜廬州燈下  
見還疑公未死揚州又繡鎧金鞍妃子粧興平一旅  
下河陽猿公劍術無人曉驚道筵前舞大娘此指高傑之婦

卽李白感懷

合肥龔芝麓尚書與閻古古極善古古繫西曹賴尚  
書左右之得脫古古上尚書詩有句云君相從來能  
造命湖山此去好容身深感之也

黃九烟周星前進士也上元人流寓湖州年七十忽  
感愴於懷自撰墓志作解脫吟十二章縱飲盡一斗  
大醉沉南潯河而死時五月五日也生平與尤悔菴  
侗極善嘗遊冒巢民春暉園詩云婪老吳山五十年  
今朝始得臥蒼烟三峰已叩生公石一水還浮米芾  
船海國衣裳各士會醉鄉花月美人天豪情勝事莫



千古那羨蘭亭共輞川又登劍閣句云壁異黃州安用赤壺非蓬島印同方

冒巢民司理襄居如皋堂名得全園名水繪往來名

士之盛不啻玉山諸勝有同人倡和集如戴介眉

詞壇宿將君何忝酒國長城某在斯吳蘭次綺狂

白袷春無賴醉瀉紅珠夜奈何龔芝麓鼎孳時窮竟

合謀歡老情至終如善怨何徐方虎倅人憐滄海遺

民少詒聽開元逸事多又房中煖老珠三艷堦下承

歡玉二柯于象明梅襟期劇孟田疇後風味盧仝陸

羽間皆名句也

錢 之於柳是龔 之於顧橫波同類燕人之

惑易惜無蘭湯以洗之宣城梅耦長庚有題顧梅生

畫蘭云半幅雙鈎楚澤春南朝舊部總傷神蘼蕪詩

句橫波墨都是尚書傳裏人蘼蕪柳小字也托諷遙深亦屬

寔錄耦長刻有漫與集

吳梅村祭酒病中詩云忍死偷生廿載餘而今罪孽

怎消除受恩欠債須填補縱比鴻毛也不如又我本

淮王舊雞犬不隨仙去落人間其言亦哀矣梅村最

工歌行若永和宮詞蕭史青門曲圓圓曲聽女道士  
卜玉京彈琴歌等篇皆可方駕元白也圓圓者吳下  
女伶陳姓轉入田皇親家吳三桂見而悅之及破闖  
賊取之去吳之舉兵爲圓也旣爲平西王夫人寵貴  
無比後爲正妃所妬辭宮入道吳逆敗不知所終梅  
村詩云全家白骨成灰土一代紅顏照汗青又云得  
婦江南謝阿蠻諷甚當

寶坻王子銓瑛任惠州太守時與僧靈源輩飲於官  
署署後遍山木棉因以朝霞一片木棉花爲題詩未  
竟座客有索西瓜者忽見一人擔瓜數十在傍詳視  
其貌虬髯碧瞳迥異凡相王心異之遂盡買其瓜而  
去歷三十年王官浙江溫處巡道解組寓姑蘇患痢  
頗劇扶卍請方有降乩詩云朝霞一片木棉花太守  
筵前曾賣瓜屈指於今三十載勸君依舊服胡麻蓋  
王少年患痢曾服胡麻丸而愈因再服之果瘥擔瓜  
之人已成卍仙異矣

冒巢民晚築一室曰匿峰廬西泠女史周瓊題句云  
滄海鍊身猶竦骨鹿蕉覺夢更清狂周繼高有句云

秋月湧波翻屋影西風隔岬碎人言龔芝麓尚書有  
匿峰廬七月十六日夜卽事句云露華滿地竹風低  
起坐閒吟到曉雞絡緯亦知秋月好五更枝上盡情啼  
巢民讌集名流必出歌童演劇有楊枝秦簫徐郎諸  
人徐郎名紫雲色藝冠絕流輩瞿有仲詩云秦簫爲  
歌楊枝舞就中紫雲尤媚嫵又云黯然把酒顧紫雲  
爲我重贖將進酒其風致可見後爲宜興陳其年所  
眺巢民遂贈之其年畫其小影携之出入同人題咏  
甚多王阮亭句云黃金屈膝玉交杯坐盡銀荷葉上

灰法曲自從天上得人間那識紫雲迴武進陳賡明  
云憶脫春衫花底眠新聲愛煞李延年只今展卷人  
猶在何處相看不可憐尤悔菴云西園公子綺筵開  
璧月瓊枝夜夜來小部音聲誰第一玉簫先奏紫雲  
迴揚州宗定九云一曲新歌水繪間冒家衛紫似雙  
鬢因思昔日彭陽事錦瑟曾令侍義山好事者多傳  
之其年亦有句云余本王謝兒鄙性惡拘繫作人喜  
聲樂獨宿語多雲先生實知余體恤無不逮感激在  
心脾料理到微細又鈕玉樵觚臙云如臯冒辟疆家

有園亭聲伎之勝歌者楊枝態極妍媚知名之士題  
贈盈卷惟陳其年擅長閱二十年而楊枝老矣其子  
亦玉人也因呼小楊枝一日讌集辟疆出前卷相示  
邵青門題其後口唱出陳髯絕妙詞燈前認取小楊  
枝天公不斷消魂種又值春風二月時

陳其年往來得全堂最久及官翰林寄書巢民云昔  
遊歷歷舊事明明水繪朝烟鉢池夜雨都縈懷抱難  
問音塵屬在深情定均斯慨其年贈巢民詩云乾坤  
高上傳花月輞川圖又云此生原是悞何計不言愁

又小秦淮曲數首最雋今錄其二廣陵城外小樓多  
秋水盈盈剪越羅記得昨宵樓上女斷無人處注橫  
波又老去心情不自持板橋細柳一枝枝誰將碎雨  
零烟恨說與風流小庾知

虞山徐芬若蘭詩格雄健極爲漁洋所稱賞有出居  
庸關詩云將軍此去必封侯士卒何心肯逗留馬後  
桃花馬前雪出關爭得不回頭此尤膾炙人口者也  
芬若又有蒙古象棋打鬼等六歌皆集前人句爲之  
組織天然減盡鍼線之迹刻出塞詩鈔內芬若號芝

仙

朱子常中丞綱詩最佳而不多見嘗有句云畏身鋪長簾患風去短屏去字極自然

會稽令咎原彥茹芝與弟茹穎齊名而原彥詞翰詩

文更優有出塞詩云馬頭東去雁門關回首三城指

顧間恹雙鷗最無賴凌風飛上塔兒山又一曲琵琶

酒一行高樓夜半朔風鳴今朝始識伊涼調盡是

關山草木聲原彥又號抱雪世居桐城杏花村

海寧陳香泉太守奕禧書法名天下詩格更高有灑

縣阻風句云風傳冷樹飛霜葉雁宿秋江老白蘋風

味不讓唐人漁洋謂邢太僕徐庾文章建安體悔教

書法掩詩名可以移贈

童筠山陰人遊毛大可檢討奇齡之門工詩文幼聘

姑女田玉娥未婚而童以事北上田送之詩曰錢塘

相送遠過此是杭州月杵春鄉夢霜砧搗客愁渡頭

千樹老江上一帆秋無限臨收意東西水自流後童

竟不歸而田以天亡

陳恪勤公鵬年文章事業為一代偉人詩更灑落有

絕句云。隔簾幽韻上焦桐。一曲湘靈奏未終。略記年時春雨夜。海南新試小薰籠。清華秀贍未嘗未。奪風雅之幟也。

歸安陸巢雲師臥病寓齋。偶咏云。悠然木榻寄僧寮。靜裏聞鐘轉寂寥。暖律倦吹寒谷熱。朔風偏助病魔驕。醫多變症非方悞。酒剩空囊亦興消。只有短檠憐客苦。半明半滅伴深宵。風調酷肖龜堂老子。

華亭王瑁湖相國頊齡過仙霞嶺有句云。傳車行木杪。候吏謁雲端。新秋句云。醉思湘簟滑。涼愛竹窓虛。

薛澱副相九齡送人句云。夢中有路終難別。肘後何方可療貧。儼齋司空鴻緒贈人句云。投轄客同官閣臥。賣文錢向酒家留。冬日句云。溪雲曉宿巖前寺。霜日晴懸江上村。可稱江左諸王人人有集矣。

江都宗定九元鼎自號梅西居士。詩格華瞻。有題鄧尉山圖云。鄧尉梅花四十里。具區三萬六千陂。山中正對漁洋景。令我尋思歷下詩。徐電發檢討鈞云。定九一號小香居士。晚隱廣陵之東原。自著賣花老人傳。蕭靈曦晨爲之繪圖。王西樵考功士祿題以詩曰。

飲香浴露詞人筆。小白長紅野圃春。時賞一枝博新  
咏。幽情兩屬灌園人。又何來筆墨關卿事。不惜畦邊  
千錦叢。多少清詞飽。虫蠹風流輸與賣花翁。自是廣  
陵春遊者。過紅橋一帶多說賣花老人逸事矣。  
索果亭克詩多清刻有味。如春歸空艸色。鳥語各花  
枝。白雲深古寺。綠水悅騷人。白餘樵徑雪。青滿鶴巢  
松等句。皆可誦也。果亭素菴之弟。

談半村汝龍字敬業。吳下人工詩賦。脩書內殿。因  
事維繫鬱塞。不得志。往往發之詩歌間。以酒自娛。不

修邊幅。有和人送春詩云。送春詩到識春非。我獨端  
居荆棘園。杜宇亦知人意苦。隔牆高叫不如歸。

半村與余交最善。相依園土中。晦明風雨。刻意苦吟。  
半村嘗有句云。狂飈無影摧花散。夢雨成陰障月昏。  
詩惟寫意。隨唐宋酒。借陶情。任聖賢。蓋不衫不履。多  
自得之趣。及與余無題倡和。諧作不綠人似梅花淡。  
肯繫情如春水。濃夜月樓臺。楊柳苗春風。簾幙鳳凰  
裙。則又清麗芊綿矣。半村嘗爲余言山陰女子薛小  
英詩詞兼擅。以所適非偶。抑鬱而死。小英有無題詩

云昨夜懷人綠瑣窓燈枝如粟吐銀缸風聲入樹驚  
棲鷓月影移花閃睡厖撫枕應知腸斷九窺簾猶憶  
日成雙玉奴不省當年約枉乞春絲繡佛幢

閣古古在濟南有詩云四圍松竹山當面一望樓臺  
水半城雖本白太傅燈火萬家樓四面星河一道水  
中央而所寫境地不同如鄧孝威漢儀過大庾嶺人  
馬盤空細烟嵐返照濃亦本村遠行人小荒城落照  
偏之意句在伯仲難分軒輊

家伯初自老人嘗教余詩律謂詩之厚在意不在辭  
詩之維在氣不在直詩之靈在空不在巧詩之淡在  
脫不在易須辨毫髮於疑似之間餘可類推所著敬  
業堂集中分小集多至十餘種宋人惟楊誠齋有之  
老人歸田以及患難又有餘生詔獄生還三集家七  
倫弟刻於嘉善老人有句云座中放論歸長悔醉裏  
題詩國自嫌又人來絕域原拚命事到傷心每怕真  
子每喜誦之又有花朝晴示僧道楷詩云初日烘雲  
碎作霞討春人競出江涯老來不喜聞桃李別約山  
僧看菜花此與宋魏野所作城裏爭看城外花獨來



城裏訪僧家。殷勤覓得新鑽火。爲我旋烹岳麓茶。意相似。

錢振芝。天上。有星臨薄命。人間無藥治相思。之句。爲世傳誦。而半村無藥。可消衰髻。自有絲難貫。淚珠紅。其感時傷遇。淒楚倍之。

嘉定孫松坪

鼓彌

髻齒之歲。卽以詩名掉鞅詞場。致

身禁近者四十年。其題秦淮小榭四絕。最佳。赤欄橋外柳千條。一曲青溪漲晚潮。鴉管偷聲催月上。不知何計不魂消。南部烟花失舊聞。都無歌笑有愁雲。才

人潦倒佳人老。腸斷當年白練裙。艷曲空傳燕子箋。如雷羯鼓鬧燈船。可憐三五花梢月。曾向臨春閣外圓。欸乃聲中酒半消。水天閒話總無繆。不須重數華胥夢。衰柳秋風覓六朝。又松坪未申集載歸舟口號一絕云。有淚河曾灑路窮。小船欹側逆流中。科頭白眼傾尊酒。飽看人家使順風。具見磊落胸襟。

秀水徐壽謀。天稽號南皋子。神思風骨清挺超妙。與余在朝。勿齋方伯離相齋。倡和最久。一夕三人共坐。方伯口占一律云。門前休問有柯人。舊雨惟君意更

親博覽羣書推甲子高懸銀燭守庚申披裘捫虱論  
今古捉筆塗鴉數夕晨元定設著逢遜日只應焚稿  
莫逡巡南臯刻有小集一冊德州孫莪山勸爲之序  
有春遊曲云狹路香車捲細塵如花一隊出城闈春  
風無賴垂楊柳故把狂絲罨畫輪

朝方伯熟精內典顏其齋曰離相有詩云幾年心苦  
坐蒲團見道非難證道難本性豈容隨物轉初心何  
必要人安工夫恰似銷金鑛滋味還同啖鐵丸如此  
修持爲正覺若它觀者卽邪觀

家伯查浦老人平生遊迹遍天下所至覽眺留題往  
往贈炙人口而燕京雜詠百四十首尤騰譽都下康  
熙庚辰辛巳間來遊天津居吾家于斯堂前後幾及  
兩載時與趙秋谷執信姜西溟宸英智元彥茹芝朱

字綠青劉大山巖擘牋飛聲殆無虛日至今猶想見

前輩風致也一日飲遂閒堂留別主人云歲晏論交  
地淹留得此堂月沉詩酒海花照管絃場客位新咨  
目書叢舊墨莊東州推逸黨曠達爾何妨樂事隨時  
換朝昏景不窮徑移新窠人占好房櫳泥酒更更

醉分燈院院紅豈知簾幙外昨夜有霜風石勢侵廊  
斷池光拂檻流路迴亭似鵲簾捲屋如舟徑竹蕭蕭  
暮盆花艷艷秋客愁渾減盡遮莫少年遊才子今張  
率名園比謝亭門無辭客例家有益齋銘願我頭將  
白逢君眼共青茫茫人海內此跡豈浮萍子弟基學  
開三人咸克世其學學有研北詩抄開有吾匏亭稿  
皆長洲沈編修德潛爲之序行

惲南田格字正叔又曰壽平善沒骨設色花卉

昭代稱爲第一虞山玉石谷翬亦以山水名家凡二

君片紙尺幅海內皆爲爭購壽平有寄石谷時云收  
得江山在錦囊霜天乘月下滄浪尚留琥珀蘭陵酒  
襍被同君話草堂二君襟期灑落當不獨以丹青爲  
能事也

余居北寺九年二三朋好時時慰問或投以吟筒互  
相倡和由是紙墨日多其中名作如沈麟州元滄青  
雲早達原非幸白首論交未是遲沈良恩青崖吟到  
梅花連月冷話深爐火入灰微程廷儀可式春回小  
院先啼鳥香吐寒梅欲染衣鄧雪珥文煊事雖千局

變心共一燈。明高素臣。日時拙匠長。饑仍刻鵠壯夫。  
今老尚雕蟲。又去留躑躅。爭枝鳥行止。飛揚遶苑蟲。  
錢脩亭。陳羣。美人悲未嫁。多坐良媒誤。由來情好鍾。  
愛極翻成妬。鮑集軒。鳳翔。艸蘭香。馥尋南嶺毛。笋生。  
鮮買破塘許子遜。延鑠。楊柳亂烟春。店曉海棠疎雨。  
小樓寒。文紙閣。茶濃煙篆晚。板橋花拂酒旗香。又風。  
梳翠艸晨抽帶。魚咬華星夜吐珠。又深林葉落堪容。  
月。北牖簾疎。慣引風。丁芝田。鶴腸惟嗜酒。時偏潤鬢。  
為吟詩半已斑。又蒲團佛笑拈花影。板屋人融凍雪。

痕王兩楓霖。半生噩夢霓裳曲。此夕王郎斫地歌。又。  
啣碑石闕將誰訴。落溷花枝一任風。皆一時酬倡之。  
作堪入主客圖也。

宗室香嬰居士。文昭。字子晉。從漁洋學。詩一日與從。  
祖紅蘭主人分韻。有句云。花香高閣近。書味小樓深。  
主人極為激賞。後益肆力為詩。有絕句云。小徑深沉。  
繡綠苔。曲闌干外。儘徘徊。似疎半密。三更雨。墻角碧。  
桃無數。開子晉。居右安門外。趙村有紫幃軒集。  
尤展成。侗。良齋雜說所載。毛大可檢討。姬人曼殊遇。

老尼一事令人有天涯淪落之感曼殊養病墳園當  
晚春時比鄰刺梅園老尼過之讀壁間所懸詩軸二  
絕云河外人家郭外村金鞭玉勒走王孫豎橋東畔  
迢迢路芳草斜陽畫閉門畫樓高處故侯家誰種青  
門五色瓜春滿園林人不見東風吹落海棠花相與  
吟嘆良久尼曰讀此詩倍覺此地淒涼此何人詩耶  
姬曰舊懸此庭不知誰作因流涕久之甚矣詩之感  
人若此後於摩訶菴中道之有識者曰此蕉林集詩  
也蕉林為真定梁相國所居故名其集其詩乃春郊

十首之二老尼遂從相國乞歸一册尼係明季宮婢  
當時稱菜戶者

朱竹垞檢討彝尊與漁洋齊名海內趙秋谷宮贊執

信作談龍錄嘲之曰朱貪多王愛好余嘗讀竹垞翁

瞿谿詩云鳥驚山月落樹靜谿風緩法鼓響空林已

有山僧飯似又非貪多矣秋谷詩法二馮格律甚細

刻者有蠡海葑溪二集

余舊與朝勿齋談半村吳寶岬陳琰同作小遊仙詩

寶岬一絕最佳自整花冠向鏡臺天衣稱體不須裁

呼童特地除松徑曾訂雲英早晚來

諸城丁野鶴耀元官椒邱廣文忽念京師舊遊策長

耳驢冒風雪日馳三四百里至華嚴寺陸舫中召諸

貴遊山人琴師劍客雜坐酣飲笑謔怒罵淋漓興盡

策驢而返又漁洋載徐東癡夜逆旅見一客衿褶急

裝據案大嚼旁若無人見徐少年呼就語曰吾東武

丁野鶴也頃有詩數百篇苦無人知子為我定之因

擲一巨編示徐尚記其一律云陶令兒郎諸葛妻妻

能炊黍子蒸藜一家清福皆耽隱十載勞形合靜樓

野徑看雲雙屐蠟石田耕雨半犁泥誰須更洗臨流

耳憂憂幽禽盡日啼

毗陵董玉蒼妻吳文璧永和以貞節聞所著苔牕集

着語清新有語諸女伴句云莫訝隨行步每遲難將

愁緒訴心知比來欲識儂懷抱試看芭蕉未展時吳

江潘稼堂為作傳

華亭鉛子和尚紺池宗渭作詩洗盡鉛華獨標雋逸

陳其年記其一事云有僧以詩名遊陽羨投詩一卷

乞序覽之皆出吾友紺公所著不覺失笑調偷聲木

蘭花一闕以戲之後同史子雲臣過吳門訪公梅隱  
述其故一座闕然公曰是母足異曾有僧假余詩謁  
王阮亭先生中有亂松殘雪寺孤磬夕陽山句先生  
見之嘆賞不已贈詩曰愛公殘雪句何減碧雲篇列  
漁洋集中又載之池北偶談此亦何異一一鶴聲飛  
上天耶

平樂太守佟鏞妻趙恭人早寡依兄公鏞僑居天津  
鞠子濬成進士生平作詩最富不輕示人而絕無脂  
粉之態其祭竈詩云再拜東厨司命神聊將清水饒  
行尊年年破屋多塵土須怨夫亡子幼人又題邊塞  
圖云黃沙漠漠迴無垠萬古關河不度春今見畫圖  
腸欲斷可知當日戍邊人二絕爲世傳誦所居曰殘  
夢樓因號殘夢主人

蔗塘外集

蓮坡詩話中

宛平 查為仁 心毅

許子遜送春八絕風流淡蕩一洗陳辭錄其最佳者  
 吳兒日莫蹋歌回紈扇痕新裏底開鷺子一雙斜掠  
 地不隨春去却飛來逐隊障泥南陌頭畫船蘭櫂開  
 蘇州送春不送歸天上兩兩三三到虎邱橋連芳草  
 酒旗青醉晚當壚倒玉瓶十里好風吹不住亂紅飛  
 雨過長亭竹垞翁見之劇加咨賞謂鷺子一雙好風

蓮坡詩話中

二



十里令人對此黯然

辛丑仲春余遭炊白之痛同人和悼亡詩甚多中有  
修。蔗。村。姬。人。艷。雪。七。絕。更。佳。其。結。句。云。美。人。自。古。如。  
名。將。不。許。人。間。見。白。頭。用。意。新。異。

燕京難花之巧其功可奪造化如牡丹碧桃玉蘭迎  
春探春之類於三冬皆可計日而得查浦老人曾有  
詩云出窰花枝作態寒密房烘火煖催看年年天上  
春先到十月中旬進牡丹談半村亦有句云始知北  
地花兒匠巧勝唐宮剪綵人

方實村觀察鳳瑛蘆花被句半江烟月壓歸夢一榻  
霜華伴老禪可配元吳景奎咏蘆花褥一聯云瓊膏  
積雪和烟凝銀浦流雲入夢涼又元人咏蘆花被一  
聯云西風吹夢秋無迹夜月留香雪滿身措語甚佳  
惜忘其姓氏

荆州守袁籙菴韞玉為吳郡佳公子風流才調詞曲  
擅名遭亂北都佐藩西楚尋以失職空囊僑寓白下  
扁舟歸里惆悵無家吳梅村以詩贈之曰詞客開元  
擅盛名蕭條白髮可憐生劉郎浦口潮初長伍相祠

邊月正明擊筑悲歌燕市恨彈絲法曲楚江情袁所製西

樓樂府中有善才已死秋娘老濕盡青衫調不成又

楚江情一絢籜菴一日出飲歸月下肩輿過大姓門其家方燕客

演霸王夜宴輿人云如此良夜何不唱繡戶傳嬌語

乃演千金記耶籜菴狂喜幾墮輿

梅村將至京師寄當事諸老云平生踪跡儘由天世

事浮名總棄捐不召豈能逃

聖代無官敢即傲高眠匹夫志在何能奪君相恩深

自見憐記送鐵岬詩句好白衣宜至白衣還反復吟

咏不勝悽楚嘗記雪菴和尚一絕云看了青燈夢不

成東風滾雪落寒聲半生客裏無窮恨告訴梅花說

到明可以贈之

越僧索畫於沈石田寄一詩云寄將一幅剡溪藤江

面青山畫幾層筆到斷崖泉落處石邊添箇看雲僧

石田欣然畫其詩意答之崑山顧俠君嗣立題鐵犬

上人憩杖雲根圖云椶鞋箬笠水邊行魚鳥知君拄

杖聲莫占前山一片石添余同坐看雲生不減前詩

風致

乙巳重九家松晴 奕補 種菊顧顧齋招同魯亮儕之

裕徐芝仙 蘭 張眉洲 坦 符藥林 會 譙賞亮儕和余韻

云坐擁花城賦好詩詩成呼酒一酬之花神解撥詩

人興細細寒香出眾枝後十日眉洲作展重陽詩芝

仙和之云落英何待展秋光三逕風流未盡荒佳會

即今為上九吾徒終古在高陽賞心香泛山杯冷照

眼花迎夜雨芳想見開成當此節六宮稱慶道勝常

十月初余又邀諸公賞於澹宜書屋眉州句云恍疑

身入眾香國共訝秋存小雪時藥林句云闌花抱短

日寒綠洗幽媚

錢唐符藥林 會 著有春鳧小稿及賞雨茅屋雪泥鴻

爪等詩集流傳南北其歲晚詩云橫陳棊几窟窓前

看裊茶烟落鬢邊撥置故書閒竟日不妨又手過殘

年又歸自橫塘云浮石還溪水半篙綠鱗鱗動散魚

苗歸來滿地夕陽影知了一聲鳴柳稍其神韻不減

姜堯章

陳恪勤賦冬日感懷十首手書贈子敘述生平悲歌

感慨今錄其二平生夢落五湖邊竹馬重來事黯然

蠲賜歡聲方動地。滯淫秋水又浮天。東南財賦無籌策。士女嬉遊有歲年。春樹萬家烟霧裏。白公堤上每流連。又塵中空羨大丹還。虎豹何須扼九關。日對道書眠石室。時聞仙客下蓬山。金蕉自足容鷗沒。海嶽猶能伴鶴閒。墨瀋酒痕猶在眼。舊題應滿翠微間。湘潭張湘門少廷尉。璨有齋名學量因。自稱學量老人。爲護使時。居予澹宜書屋前後約三年。晨夕倡酬縱談。上下嘗爲余言。有詩二句甚佳。忘其姓名。因代作前二句以成之。南軒北牖復東扉。取次園亭待我歸。

歸當路。莫栽荆棘樹。他時免掛子孫衣。用意深厚仁人之言也。

牧齋多遊戲筆墨。有反東坡洗兒詩云。坡公養子怕聰明。我被癡猷快。一生還願生兒。猷且巧鑽天鷲地。到公卿觀此詩。可以知其趣向矣。昔宋鄭清之罷相後登塔詩云。今日方知高處險。不如歸臥舊林邱。而王介甫未遇時登塔詩云。不爲浮雲遮望眼。只因身在最高峯。洵乎人之出處行誼。皆可於筆墨流露中驗之。

胡象三捷幼有神童名十歲能詩文與余同視席者三十年其詩清潤和婉時出性靈有和余元旦詩云百歲渾消幾首詩醉吟愁咏費相思破正清興還無著飛上梅花三兩枝又有高下歸鴻影紅黃老樹村愛間身少累媚俗骨無能及山擁白雲西塞兩霜吹紅樹秣陵秋貧入愁腸偏曲折秋來詩骨倍嶙峋等句象三為梅宮詹之珩所拔士與泉亭老人魏燕公尚質為忘年交

毛西河選浙江閩秀詩獨遺山陰王氏王氏有女名

端淑寄西河詩結句云王嬙非不無顏色怎奈毛君筆下何引用二姓恰合

徐芬若從軍沙漠路經青塚徘徊竟日囑虞山黃遵古鼎繪其圖以歸都下名士以為奇觀競賦詩咏之

竟陵唐赤子建中詩曰咄哉徐君真好奇勸客一飲連十卮酒酣手持青塚圖邀客為作青塚詩自言邊

地盡飛狐青塚猶在邊西陲世人但聞圖經說我昔從軍親見之前臨黑河後祁連黃沙千里胡馬迷其地萬古無春風但見白艸常離離一杯獨戴中華土

青青之色長不萎。我時往拜值寒食。繫鳥塚前古柳枝。此柳亦疑漢宮物。枝枝葉葉皆南垂。下有無名之石獸。上有無主之荒祠。獸腹依稀青塚字。刻畫認是唐人為。祠中絡繹獻桐酪。碧眼倒地呼闕氏。至今牧兒不敢上。飛鳥絕聲馬不嘶。却為奇跡人罕見。擅場畫手黃生宜。請看慘澹經營處。山川粉墨無參差。按圖一一為指點。百口稱快含嗟咨。有客引滿前致問。先生圖斯焉。取斯嗚呼噫嘻。先生之意。客豈知。男子有才女有色。往往自愛如山雞。王嬙本是良家子。對

鏡顧影常矜持。一朝選入深宮裏。風流不數西家施。誰知承恩亦在貌。君王莫辨妍與媸。但願君王辨妍媸。妾辭遠嫁呼韓邪。音所以喟然越席起。仰天不復揮涕洟。五鼎生烹主父肉。馬革死裹伏波屍。古之烈士多如此。高山河水當怨誰。此意天地為感動。墳艸四時迴春姿。徐君之才滿一石。白首著書十指抵。新詩句句在人口。清如珊瑚敲玻璃。可憐三載飢臣朔。文章酷召數命奇。雖從王門堂書記。時平不須投毛。雖非無要路。與捷徑。丈夫致身羞以貲。正如明妃恃

其貌。你強不肯。賂畫師。人生遭遇有不一。侘僚豈卽。非良時。假使明妃宮中死。安得香名流。天涯披圖知。君心獨苦。別有塊壘。非蛾眉君不見。杜陵咏懷生長。明妃村乃。與庾信宋玉蜀主諸葛同傷悲。

阿雲舉學士。金罷官後來于斯堂。與家大人劇譚縱。論文采葩。流枝葉橫生。聽之忘倦。偶記論李義山。昨夜星辰昨夜風。與聞道閨門蔓綠華。二詩謂崑指王茂元家妓而言。蓋義山爲茂元之婿。又爲其書記。隔座送闌分曹射覆。非家妓而何。想時適有事奉命而

去。是以有聽鼓應官走馬蘭臺之句。至豈知一夜秦樓客。偷看吳王苑內花。更其明証也。舉座爲之一咲。又有惆悵詩云。惆悵西湟白髮知。舊遊歷歷入新詩。追思醉帽吟鞍日。尚記華燈縱博時。花暖聯鑣春騎射。雨涼留客夜圍棋。而今腰劍從軍後。贏得傍人笑我癡。昔學士與陳香泉太守友善。囑香泉臨玉枕蘭亭臨畢。卽以原本畀之。香泉喜曰。以魚目換明珠。鉛刀易寶劍。老姬博美女。能無快乎。

唐赤子雲間端午竹枝詞內一首云。無端鐃鼓出空

舟賺得珠簾盡上鈎。小玉低言嬌女避。郎君倚扇在船頭。其風流不減杜司勳。吳興水嬉也。

唐時僧景雲題松云。畫松一似真松樹。且待尋思記得。無曾在天台山上見。石橋南畔第三株。王漁洋題折枝牡丹云。三尺霜縑寫鼠姑。檀心倒暈貌來殊。如今疑夢還非夢。曾向南泉見一株。二詩風神意調皆妙。

有爲人祝壽者一絕。最新祝翁不效華封。祝富壽多男翁已全。但願有花兼有酒。長將花酒傲神仙。

張少廷尉璣任長蘆運使時。余至其小齋。見廷尉手書單幅粘壁間。云書畫琴碁詩酒花。當年件件不離他。而今七事都更變。柴米油盐醬醋茶。嘗爲余言古人歌謠出於天然。故妙。近日楚中小兒求雨謠頗好。青龍頭白龍尾小兒求雨天。歡喜大雨落在田隴中。小雨落在花園裏。未嘗不可播之樂府也。

龍眠方復齋先生爲江南望族。行七余年。二十復齋已六十九矣。方氏諸名宿往來水繪園最久。故復齋談冒氏掌故最詳。所言同人贈答詩文多有本集他



書所不載者辟疆有姬人董白字小宛金陵人善書

畫兼通詩史早卒辟疆作影梅菴憶語悼之一時名

士吳蘭次荷以下無不賦詩以贈温陵黃俞邵虞稷

二絕更佳冒見之哀感流涕其詩曰珊瑚枕薄透嬌

紅桂冷霜清夜色空自是愁人多不寐不關天未有

哀鴻半床明月殘書伴一室昏燈霧閣檝最是夜深

淒絕處薄寒吹動茜紅衫

黃岡杜于皇濬五月坐雨湘中閣和巢民云何處動

鄉情湘中閣前雨極望猶嫌雨點稀天涯雙淚潛然

補此中端不異湘中湘水湘烟事事同烟裏一枝疑

晚霽却看乃是榴花紅榴花自燃竹自濕高竿盡作

湘妃泣更洗新桐葉斬齊陰森只許黃鸝入可憐楚

客澹無言臆外又聞急雨喧此際鄉思但求似安得

一箇啼哀猿又云吾鄉絕境以瀟湘為最而瀟湘之

勝尤在雨中此閣命名已見真賞乃以屬和于去國

三十年之楚人讀之泣數行下此真瀟湘雨也

雍正甲寅秋夜夢至舊遊地得句云貪將葉葉花花

地趁取風風雨雨天高館人歸餘積蘚空階日暮起

寒烟醒後續成一律家選佛義和云臥遊愛續醒時  
句蕉境難忘夢裏天繡佛齋頭花似雨真珠亭外柳  
如烟家松晴奕柳和云半偈心香人去夜一床雲影  
雁來天想中因果三生石句裏光芒五色烟選佛從  
家初白查浦學詩二十年詩筆老成松晴字貢木先  
宮詹聲山兄之孫

開封司馬許渭符佩璜學有淵源少稟母訓所著詩  
文具見根底贈余詩云庇人孫北海置驛鄭南陽又  
曾能貯鄴窻怪本嗜林泉後奉太夫人來游水西莊

太夫人有句云旅思搖風鐸歸心縱壑魚又竹籜合  
新粉藤花落細香又潮來初拍听雪起忽遮樓木夫  
人錢塘徐清獻公旭齡女名德音熟精文選流覽滿  
家至今老年猶日閱書一寸

新城高宗山孝廉子友素臣廣文之子才華宏麗贈  
余有東山麗句諧絲竹北海名賢共酒尊及甲部攤  
經丁部史紅兒記拍雲兒歌等句

澹宜書屋雜蒔漳蘭一萼忽呈十瓣驚為創見各賦  
以詩吳東壁司馬廷華句云重樓交結同心佩一箭

連。抽。十。相。花。汪。西。顥。徵。君。沈句云膏綴重臺情暗結  
香。縈。擁。背。畫。難。成。趙。谷。林。徵。君。昱句云幽處探香憐  
二。妙。秋。來。初。佩。字。覆。成。西。顥。又。謂。同。心。十。瓣。蘭。可。以  
卜。燕。姑。之。兆。填。滿。宮。花。一。闋。有。句。云。一。花。一。葉。有。餘  
香。况。爾。十。成。多。麗。又。知。應。繡。閣。兆。雙。璋。看。取。夢。徵。羅  
袂。西。顥。一。稱。槐。塘。街。人。

天津城南地勢窪下夏潦秋霖汪洋彌望冬則冰膠  
如鏡居民以凌床往來共行如飛魯存弟邀同人作  
冰泛之遊魯存得長歌一篇內有句云晶瑩倒射天

影曰七十二沽無水聲極為儕輩推許西顥有句云  
到處回頭都是听從今托足不隨波頗具禪味昔年  
姜西溟編脩遊天津時曾有水車詩云大氣有屈伸  
長河白晶晶千里共積素篙工失慄矯此物遂梳行  
連繩在纏繳平行枕席上凌厲樹木杪水居仍非舟  
空鷺疾于烏頓失波濤寬坐晒餘艖小利涉有所須  
取濟本易了東風俄司令萬物變枯槁流澌一朝盡  
百川競奔繞之時爾何為棄置亦以渺刻木昔王典  
出坎理則擊江湖豈終極萬古流浩浩

半雨詩道人北山來問松我東岡舉手指屋春云今  
如許長極平淡中而意味無窮漁洋聽琴詩云曲罷  
孤月明溪光散清泚主客無一言露坐攬衣起二詩  
皆可細參

長貧知米價老健識山名二句造語甚佳忘其姓氏  
方復齋時誦之

余于己未元旦有句云春色淺深簾幙外梅花消息  
酒盃間槐塘和云節交歲尾年頭候花放梅兄攀弟  
閒萬柘坡孝廉和云綺歲盡歸推轉裏春光猶在有

無間柘坡秀水人年二十舉宏博驚才絕艷落筆如  
神

杭堇浦編修世駿首唱方鏡詩二十四首傳誦輦下  
和者自王侯以逮公卿士夫方外閨秀無不有作幾  
及數千家誠輦下僅事也記其一律云雲葉裁量片  
片方水仙晴漾日生芒兩邊透透照成三影四角迴中  
稱五光宛似寫形歸畫幃不妨偷樣學青塘劇憐空  
艷無人會輸與璇圖織錦張

吳天章徵君雲居蒲州永樂村為新城入室弟子有

門前九曲黃河水。千點桃花尺半魚。之句余極愛之。特恨不得窺其全豹。已未秋友人自山右來。篋中携其鈔本詩一帙。即假歸手錄而門前九曲一首。惜已佚去。不勝遺珠之憾。其他五言。如潮來全楚。白雲上半江陰。一燈殘夜後。百感壯年來。鐘鳴少林寺。月上轅轅關。階前雙樹老。戶外一峰閒。泉遶漢祠外。雪明秦樹根。七言如倦馬爭投盤。豆館飢烏空噪赫。連臺時驚橘。綠橙黃。侯路入秦頭。號尾間。常年情事悲。鴻瓜近口文章愛。馬蹄河聲臥聽崑崙遠。嶽色晴瞻太

華高寒瓜引蔓垂。茆屋野水生波入。稻田皆得唐賢之神髓者也。天章墓誌新城撰。蓮洋集新城親為評

隋  
天章桃花夫人詩云。桃花夫人好顏色。月中飛山雲中得。新感恩仍舊感恩。一傾城矣。再傾國。漁洋曰。王右丞看花滿眼淚。不共楚王言。太蘊藉矣。孫文定泚亭云。無言空有恨。兒女粲成行。與此皆妙于調笑。詩以淡而彌永。陳對漚。歲暮即事云。羈緒宵來頗未降。空階獨遶影成雙。一堆老雪明如月。賸供詩人牢

落牕此深看淡中之味者也

濟南王斗南觀察元樞過宛平相國怡園有句云如

何喬木裏只是冷雲多十字中感愴深矣

湘潭張少廷尉琛題湘帆圖二句最佳淒迷山鬼啼

春竹懽悴漁郎折岸花廷尉爲諸生時一日赴大倉

王相國揆之招座客滿堂廷尉議論橫生旁若無人

席間一羊脂玉卮不覺爲衣袖所拂墮而碎四座驚

愕廷尉掀髯而笑曰久不聞此碎玉聲矣飲酒從談

如故

李匪初旭無爲州人作詩務盡刻苦不留餘力書法

奇崛不得志於場屋分修古今圖書集成後從事河

工補蘄州通判盤山爲蘄州所屬遂日夜縱遊以致

降調且初恬如也曾有句云路從石罅盤旋去人自

松梢向背來二語於遊盤詩可謂得驪龍頷下珠矣

子家水西莊種有紅菱已未夏長洲葛信天正芻張

少儀鳳孫同客陳榕門觀察署中魯存弟以五十枚

餉之信天有詩云紅菱正美喜分甘采采新從碧五

潭莫訝鄉心又掠亂果然風味是江南藕香亭外晚

風過暑退涼生試薄羅。秋月明空秋水碧。倚闌還聽采菱歌。少儀詩云江南六月看采菱。荷衣雪腕輕橈。憑錦帆。涇裏樵烟入。滿身風露寒。凌兢曼歌一聲蟾魄上。紫莖綠葉牽朱繩。十年書劍去鄉國。鴛鴦舊夢空飛騰。直沽旅食又長夏。消渴不耐炎。煇蒸水西主人。辱存問。側生五十新荷承。清香撲人光照眼。奚奴觸手愁霜稜。鶴留丹頂鸚爪細。一彎茜影湘波凌。玳瑰輕擘水仙佩。玉膚映徹冰壺冰。吳儂得此乃狂喜。傳箋遍集諸賓朋。古瓷擎出佐芳讌。涼颺淨掃窺盤

蠅。滄州法醺瀉百斛。靈池故寔還同徵。都忘蹤跡滯燕土。但覺塵翳消胸膈。哀梨縹李世艷。稱蔗漿櫻寔瓊筵。登獨遺此品在烟水。邈如釣瀨逃嚴陵。天涯相賞有知己。不辭千里扁舟乘。孤根近託藕香榭。白蘋掩映溪流澄。芳鮮只供騷客嗜。聲價豈要皇都增。尊前一笑宛舊識。領畧風味當年曾。願携巾拂坐風檻。嬌紅婉翠圍千層。吳歛渺絲吳語軟。卜夜更命張華燈。酒酣潑墨進吳諺。春蚓十丈書枯藤。

吳江顧爾立卓無錫朱贊皇襄二人從紅蘭主人遊

最久主人有集曰玉池生稿因附銀顧詩曰雲笥集  
朱詩曰織字軒集行世主人自爲之序顧畫花鳥名  
于時主人自塞外歸途中寄贊皇詩云大漠歸來至  
半途聞君先我入京都此宵我有逢君夢夢裏君曾  
見我無時贊皇亦自江南重至都門也爾立有山行  
卽事詩云愛聽松聲入翠微寺門不掩任雲飛老僧  
見客渾無語笑向巖前自洒衣贊皇有邯鄲呂仙祠  
詩云遺像居然見呂翁衣冠疑帶海天風我今結願  
相隨去只恐神仙亦枕巾

紅蘭主人有西洋四鏡詩最妙千里鏡云數片玻璃  
珍重裁携來放眼雲烟開遠山逼近山來近山遠  
山何鬼鬼州言九點亦不止海豈一泓而已哉君不  
見昔日壺公與市吏壺中邂逅相嬉戲自從神術一  
相傳而後市吏能縮地斯言是真非是僞今設此鏡  
蓋此意君若不信從中視顯微鏡云一卷卽是山一  
勺卽是水大鵬鷓鴣同羽翰二禽各具生生理小至  
鷓鴣亦不止更有蟪蛄來巢蚊莫知人雖有目何能  
視何況目力不同科離婁師曠二子是安得空青干



萬斛均分世人令醫其目來觀此嗚呼聖人之言曰  
莫顯乎微豈徒然而已火鏡云鷄聲絕明星滅火輪  
飛海猶熱羲和射光穿玻璃不學燧人鑽木穴一團  
龍腦爐中熱多寶鏡云有客携鏡來命我持鏡視一  
人當我前更見二三四十人當我前其數不勝記濟  
濟皆衣冠竟無絲毫異如蟻復如蜂揚眉而吐氣去  
鏡更一窺餘不知所逝眸子蔽一層卽莫辨真僞今  
始覺其詐此鏡從此棄將此棄鏡心可以推而及萬  
事崑山徐原一司寇乾學亦有西洋鏡箱詩六首慕

形酷肖附錄於後移將仙境入玻璃萬疊雲山一筇  
携若說靈踪探未得武陵烟靄正迷離橫簫本自出  
璿璣一隙斜規貫蝨微髮鬚洞天微有徑翠屏雲綻  
啟雙屏交光上下兩青銅丹碧微茫望若空遮莫海  
樓雲際結珊瑚枝上現蛟宮玉軸雙旋動綺紋斷紅  
霏翠轉氤氳分明香草蘅湘路百折帆迴九面雲隙  
駒中有大羅天光影交時態倍妍鶴正梳翎松奮鬣  
美人翹袖忽翩躚乾坤萬古一冰壺水影天光總畫  
圖今夜休疑雙鏡裡從來春色在虛無按眼鏡之製

不知所自梁四公紀載扶南大舶從西天竺國來賣  
碧玻璃鏡然非施於眼也惟方輿勝覽稱滿刺加國  
出鑿鑿鏡老人不辨細書掩目則明或當權輿於此  
然前賢題咏闕如明吳寬家藏集始有謝屠公送眼  
鏡詩意者流傳中國在有明中葉耶今則製作益精  
稱名益多矣

蔗塘外集

蓮坡詩話

下

宛平 查爲仁 心毅

栢鄉魏相國五絕最佳有慧香廊詩云春在葳蕤中  
眾芳噴不歇心幽得妙聞皎皎花間月又夜雪詩云  
夜雪打空廊不知花落處只在風雪中風亦吹不去  
文安陳蘭雪僉都 儀 極愛其詩誦之甚詳

魯啟人庶常

曾煜

過津門停舟見訪贈余詩云我未

江子擬卜居君猶憔悴似三閩新交却得蒼涼後舊

蓮坡詩話下

事重提涕淚餘善舞寧憂客試鶴出遊惟有子知魚  
短檠何日能相對風雨西牕夜讀書

金君桑洲爲白河令舟行漢水濱得一石如半月狀  
色縹碧面微凸形似龜背有螺文如雲錦周匝旋繞  
底如龜板有文綠質黑章斜豎相間其旁微凹左右  
各露黃紋一道上下二面皆可作硯發墨足比端溪  
之佳者置滴水其上雖盛夏經夕不涸浸水盃中照  
日遍身皆作金色陳滄洲先生見而異之金君遂舉  
以爲贈先生意其爲千歲綠龜所化因名以綠龜硯

序而銘之更繫以長歌曰白河寶石光陸離千歲綠  
龜能化之靈文欲變不盡變想像腹背形模奇天然  
受墨可作硯綠淨波光眼中見螺文旋繞爛雲霞金  
色微芒走雷電况饒潤澤中涵濡滴水永多無乾枯  
一虛漸濛香霧點萬斛欲湧清泉珠砥平不滑兼不  
膩磨蕩能令墨花細間牕寂靜如小年往往毫端灑  
奇字桑洲金君吾故人拾此遺自漢水濱見之朵頤  
露顏色欣然解贈如珣璘玩好於我豈貪贖此石不  
得欲痛哭終朝晤對良友朋硯北真堪慰幽獨嗚呼

世間萬物變化何其多。慎勿返故歸洪波。坐使墨乾  
筆秃。我亦欲化為頑石。龜乎龜乎當奈何。

江南徐巖叟太守起善咏脇生兒詩最奇。有生愁况

下土得竅師。先天之句兒。父王華。陝西三原人。

唐六如墓在桃花菴。日久廢。傾商邱。宋漫堂中丞榮

重為脩葺。一時名士吟咏甚多。有重表唐解元遺墓

詩一卷。內韓慕廬宗伯葵一聯極妙。云誰昔唐衢惟

解哭。祇今宋玉與招魂。并有序曰。唐解元以曠世逸

才。屢飛觴而醉月。桃花塢為芳年勝地。曾聚德而占

星當時行樂之場。盡是言愁之日。人非漁父如八武

陵之溪。地接梵宮。不異元都之觀。衲衣持鉢。晚懺青

雲。少年蓮花供僧。早證台骨公案。何人不旅。卽此言

歸風。悲一邱夜長。萬古嗟乎。飛霜不擊。冤獄誰明。落

桂無枝。孤墳入恨。况復中郎有女。憔悴誰邊。鄧攸無

兒。冥茫天道。亡何木拱而伐。封斧而平。居民數家。流

水一曲。何邨收骨。迷若蒼梧。九疑有石。點頭語以韓

陵一片。蘚苔剝蝕。幾欲生金。高下變遷。斯堪墮淚。傳

之好事。達我中丞。發教而愾。子房下馬來。瞻董相垣。

其幽隧覆以孤亭。柳子岡前棗強之砲。故在鳳林山  
畔。襄陽之墓重完。感我公之意氣。千秋矧吾屬之蕭  
條。異代五湖共放。亦是當世畸人。一燈自憐。須弔下  
場才子。隻鷄絮酒。補往日之衣冠。語燕啼鶯。續多情  
之弦索。猶幸曩者跣跡之地。丈室依然。故人針露之  
題墨痕。特妙文人慧業。靈運已夙生天。再世因緣。浪  
仙自堪鑄佛。寧止一盃之薦。行修兩禊之遊。栽去後  
之桃花。待現來之優鉢。於戲。艸木氣味。何必同時。文  
字生涯。不勝遙契。春風小隊。公既爲掛劍之人。細雨

僧房走願。作鳴驢之客。敬先長句。供下掃之糠粃。用  
起諸賢綴上頭之珠玉。錢塘洪昉思鼻曰。子落拓浮  
名。雖不及六如萬一。然後先境地亦頗相似。不覺感  
慨。係之率成四詩。以寫我心。殊不計工拙也。今記其  
二。吳興僻性解憐才。踏雪唐家墓上來。豚柵雞棲無  
覓處。獨尋殘碣洗荒苔。原注宋中丞沈客子所請也頗學吳趨年  
少狂。逃禪垂老悔詞場。不知他日西陵路。誰弔春風  
柳七郎。誦之使人心惻。

洪昉思以詩名。長安交遊讌集。每白眼踞坐。指古摘

今無不心折作長生殿傳奇盡刪太真穢事深得風人之旨一時朱門綺席酒社歌樓非此曲不奏纏頭爲之增價乃好事者借事生風旁加指斥以致秋谷初白諸君子皆挂吏議此康熙己巳秋事也秋谷贈初白詩有與君南北馬牛風一笑同逃世網中之句初白答以欲逃世網無多語莫遣詩名萬口傳又云竿木逢場一笑成酒徒作計太憨生荆高市上重相見搖手休呼舊姓名後庚寅九日郭于宮於花密居招同人社集演長生殿傳奇初白老人不及赴以二

絕句答之云曾從崔九堂前見法曲依稀談段傳不獨聽歌人散盡教坊可有李龜年上客紅筵興自酣風光重說後三三老夫別有燒香曲憑向聲聞斷處叅感慨係之矣洪有集名稗畦竹垞有贈洪句云梧桐夜雨詞淒絕。薏苡明珠謗偶然亦寔錄也

汪茗文編脩瓊贈人句云家臨綠水長洲苑人在青山短簿祠與沐景題滄海遺珠集所載日本使臣天祥題虎邱寺樓臺半落長洲苑簫鼓時來短簿祠之句似暗合細味之用意各別詩格亦自不同崑山葛

翼甫夢航雜說云鈍翁作詩規模舊句間出新意如  
裝池故院無名畫傳寫前賢未刻書本方夔屏張前  
代無聲畫架插今生未見書須扶醉日移來竹亟護  
分前接過華本范成大開嘗臘尾蒸來酒點數春頭  
接過華呼我不妨頻應馬逢人何敢遽稱貓本陸遊  
偶爾作官羞問馬頹然對客但稱貓醪醑過了吾何  
恨筍老蕙殘最惱人本陸遊荷花折盡渾閒事老却  
尊絲最惱人深山交舊俱無恙惟欠樽前麴秀才本  
白居易樽前百事皆依舊檢點惟無薛秀才玉輦不

來花落盡掠鷹臺上鳥空啼本段成式鳳輦不來春  
欲盡空留鶯語到黃昏如此甚多不能悉數也

孔東塘學博

尚在

號云亭山人用侯方域李香君事

作桃花扇傳奇其間朝政得失文人聚散皆確考時

地全無假借與長生殿盛行於時德州田山蘆司農

雲題詞云一例降旗出石頭烏啼楓落秣陵秋南朝

賸有傷心淚更向胭脂井畔流鐵嶺陳子玉云玉樹

歌殘迹已陳南朝宮殿柳條新福王少小風流慣不

愛江山愛美人宋牧仲中丞云血作桃花寄怨孤天

涯把扇幾長吁不知壯悔高堂下入骨相思悔得無

陳定吳尾名士鎮周旋狎客追歡向酒邊柳敬亭蘇崑生何

意塵揚東海日江南留得李龜年

高雲老人重上長安秋日懷舊詩三十首鉛華掃盡

獨出性靈今記其數首云病老無聊客况難死生情

重憶紅蘭夢中猶喜分明見淡寫黃花帶雨看指紅

蘭主人也又江南留得顧梅花老去詩篇興倍加猶

作梁園舊賓客西風殘照送昏鴉指顧爾立也又古

香西席憶徐陵天上麟兒拜老僧十七年前曾授記

寸心今托玉壺冰指徐芝仙也又水南莊上有髯公

與我同年話始終留寫楞嚴了了義鴈王共禮白雲

中指宗室拙齋公吞珠也水南莊在東便門外二閭

河邊又最愛紅椒晚更香碧蘿翠竹映虛堂胸中別

有真高節獨對秋山畫夕陽指借山上人也又一卷

清詩冰雪寒馬驢第一說貞觀而今問盡江南客滿

眼風塵見亦難指桐城方貞觀也又海內都將詩句

誇盡從狐媚托嬌花長沙獨立人偏遠望斷汀洲雁

影斜指陳恪勤公也



徐芬若倩輦下名家三十餘人合作芝仙書屋圖一時詩家分題吟咏者又六十八觀之令人目炫如博閭亭分得苔云雨後隔簾應漠漠風前映戶自閒閒石衣水髮渾難辨且對生綃一解顏孔東塘學博分得竹云舊臥芳齋竹滿欄今年新筍又成竿相思烟水三千里倩寫墨君紙上看松江周寒溪編脩彝分得沙上細艸云細如石髮千絲脊密似秧針一抹齊若憶虞山好風景無邊春色染青谿華亭王雲岡編修時鴻分得岩上小松云纏經霜雪幾春秋點染青

山分外幽却咲丈人峰下樹千年封爵為秦留宗室拙齋公分得水閣云曲曲溪流草閣虛主人高隱是南徐却疑五月江深候滿塢松篁讀道書代州馮欽南內史歷分得小栢林云叢叢小栢儼千章翠影扶疎日月長種近仙山樓閣地好凝珠露待鸞凰大興曹渭符待詔日瑛分得艸亭云小結芳亭草覆檐周遭花藥門濃織此中好著吟詩客敢請徐熙筆自添芬若後舉此圖贈余

祥符周櫟園司農亮工村器揮霍善經濟喜議論當

大疑難神氣安閒無不迎刃而解性嚴峭居官不肯  
假借官裏人而好嘉與後進嘗置一簿坐上與客言  
海內人才某某輒疏記之官轍所至必枉車騎過之  
又令進其所知使耳目間不遺一士然後快著述多  
至數十種嘗有贈空隱和尚俗臘詩云生天良不易  
選佛亦難成但說慈悲力能銷戰伐聲病猶甘敗寺  
老益賤虛名一笑桃花發春風第幾庚卽與衲子往  
還亦不作隨聲附和語也

蔚州魏環極尚書

象樞

性至孝詩甚清挺告終養時

不復通書朝士偶以著述寓汪鈍翁惟用方幅楮題  
姓名其上而已其次介如此作循吏行送人之官云  
古人愛身今愛官此身一失官何補可稱名句聞喜  
孫君寧開經爲余誦之

王西樵考功

士祿

著有表餘堂十笏草堂辛甲上浮

等集海內耆宿如杜于皇孫豹人汪茗文尤展成諸  
公論之詳矣西樵嘗題襄陽詩曰魚鳥雲沙見楚天  
清詩句句果堪傳一從時世驚高唱誰識襄陽孟浩  
然其辨香微旨所寄可知阮亭選擇西樵詩什去二

三次爲四卷行世亦從其宗仰也

徐東癡工爲詩隱居系水之東茅屋數椽葭墻艾席  
凝塵滿座晏如也與同里王西樵阮亭兄弟極善阮  
亭爲刻其集二百餘篇余最愛之清明詩云今年春  
冷候常賒野曠烏啼日又斜寒食清明都已過墓田  
撩亂野棠花轉城詩云來看東風剪柳條土膏新軟  
雪全消轉城三面無相識黃葉隨人過板橋又雪晴  
句春來荒墅無供給雪斷柴門少送迎又午醒句布  
穀鳥鳴過麥後採桑人去在花前又秋柳句爲計使

人西去日不堪流涕北征年皆警策可諷也

高念東少宰琦山東蒙陰人骨清神佚氣靜情疎每  
風日晴和自跨一驢出遇嘉石濃陰卽繫驢而臥見  
者不知其爲貴人也有送人歸海陵句紅香塵裏休  
回首黃葉村中欲卜居出入中外三十餘年不以富  
貴貧賤動其心士大夫高之

睢州湯潛菴司空斌性至孝潛心性命之學作詩雄  
渾俊逸讀之如坐開元天寶間贈人云千里風塵驚  
短髮十年供奉憶同官送友云關河落照鄉山迴驛

路鳴蟬野樹深。又題畫云秋林不厭靜。高士自能閒。  
盡日茅亭下。開牕對遠山。出語圓潤溫厚。不矜才使  
氣。宜其理學文章爲。

昭代一人也。李天生以車笠之雅。刻其遺稿八卷。

吳江計甫草孝廉。東忍辱好奇計。負經世才不得志。

與尤展成王阮亭交最善。將至京師。有作先寄所知。  
云帝城隱隱接雲霄。又見梯航萬國遙。遂有黃金能  
市駿。不妨青海看橫鷗。乘風搖曳三千里。感舊淒涼  
十四朝。多少菰蘆遺老在。敢將詞賦問漁樵。後客鄴

城徧詢謝茂秦葬地。得之南門外二十里。見小塚顏  
墮荒艸中。賦詩弔之。求其子孫不可得。因固請鄴中  
當事爲封土三尺。餘禁里人樵牧其上。立碣誌之。曰  
明詩人謝茂秦墓。

宛陵施愚山侍講。閩章操履孤遠。學有本原。力以名  
教爲己。任作詩直追漢唐。尤善五言。有披拂散心顏。  
榮落皆愉悅。又卷言采芝人。毋使春芳歇。之句。漁洋  
謂當代詩人。目曰南施。北宋。宋卽荔裳也。

計甫艸自海陵歸。渡江會大風。雨雪舟不得發。同行

者垂首歎惋計坐舩樓下手阮亭詩讀之至論鄭少  
谷絕句哭失聲既乃大喜拭涕起坐雪中觀江濤澎  
湃吟嘯自樂阮亭論少谷詩云三代而還盡好名文  
人從古善相輕君看少谷山人死獨有平生王子衡  
王廷相子衡銳意詩文見善如不及少谷山人鄭繼  
之與王未謀面乃有詩云海內談詩王子衡春風坐  
遍魯諸生王見之有知己之感於鄭死後數千里入  
閩經紀其喪甫艸生平奇事最多余友朱導江岷久  
居江左備述其顛末

鄭谷口有二人一鄭篋字汝器江寧人善八分書兼

工吟咏一鄭餘慶字芷菑歸安人嫻經濟學著行水

金鑑石柱記箋釋二書行世鄭篋有遊山五古曾於

書州中見之詩云虛閣倚木末石竇流潺湲禽鳥得

所適嚶鳴相往還人胡獨無情不樂真愚頑况此衡

門下逍遙有餘閒肯從二仲遊何羨三神山

滹沱河之南栢棠村在焉中有梁蒼巖相國清標別

墅相國秋憶詩云城東別業輞川圖手種垂楊一萬

株大麓經秋霜幹冷綠煙猶似昔時無

余有別業在曲周庭前海棠忽於十月間雪中盛開  
大尹張若巖柯城者宿也賦七律一首甚佳和者雖  
多津門閨秀許雪棠爲最許過時不嫁工詩文閱不  
示人傳播人間者惟此詩而已詩曰移從香國種無  
雙幾見凌寒意不降日映輕紅嬌帶淚風扶弱質笑  
迎曉朱門舊許宜春睡冷院新看伴玉缸却恨杜公  
無好句空教十月渡寒江汪西顛津門雜事詩有云  
不慚書生不畫眉傳來艷絕海棠詩若教五稗稱才  
子壓倒樓頭舊婉兒正指雪棠也

東坡有題安平泉七律一首集中尖載初白老人注  
蘇詩采入補遺卷中尋碑未得作詩紀事仁和沈椒  
園侍御廷芳執友麟洲子也後過臨平於山麓得碑  
手拓以貽老人并系以詩云安隱寺外安平泉殘碑  
撫罷懷坡仙遺篇收拾隨刊得辛苦詩翁作鄭箋以  
所注蘇詩未及開雕故落句及之也

揚州紅橋之名自新城司寇爲司理時與諸名士觴  
詠而著陳其年詩云輕紅橋上立逡巡綠水微波漸  
作鱗手把柳絲無一語十年春恨細如塵又一帶蕪

城綠野烟。三春板渚亂寒田。傷心錯到平山路。不獨  
江南事可憐。又雨餘垂柳鴨頭綠。日落吳天卵色紅。  
絕似儂家掩畫裏。幾層春水幾層風。人多誦之。

周樂園司農移家白下。駐節青溪。桃葉烟波莫愁作。  
麗間訪殆遍。嘗于舟中與胡元潤談。泰淮盛事云。紅  
兒家近古青溪。作意相尋路已迷。渡口桃花新燕語。  
門前楊柳舊烏啼。畫船人過湘簾緩。翠幔歌輕紈扇  
低。明月欲隨流水去。簫聲只在板橋西。讀之幾欲作  
望江南也。

雍正元年四月。恩科福州士子召仙。競問得失。有李  
生者疑之。拉江陵張鴻齋往觀焉。路折芭蕉。一葉納  
左袖中。甫至壇下。仙卽書云。左袂携來一片青。知君  
意不問功名可憐。今夜瀟瀟雨。減却牕前數點聲。李  
始驚服。及歸寓。二鼓後果雨。此鴻齋親見。爲余言之。  
新城有記得詩二十首。今記其四云。班班車又到河  
間。越燕辭巢幾歲還。記得繡堂紅燭下。有人和淚唱  
陽關。風迴曲陌漾遊絲。新作浮萍綠漲池。記得去年  
今日見石欄。西畔牡丹時。瑯琊悵爲情多。記得臨

岐喚奈何千媚中央隨處好最難忘處是橫波菖蒲  
花好乍聞名花底從教過一生記得迴廊人語寂卸  
頭纔罷月微明一云此詩罷官後贈妓月仙者

錢塘薦太鴻徵君鵲以詩名海內者三十年著有樊

榭山房集十卷清微孤峭於新城長水外自樹一巖  
承學之士奉為圭臬今年落燈日以手書詩筭見貽  
內有紅橋春游曲風調直逼元相其詞曰客愁當春  
亂如絲掛在紅橋新柳枝主人官小肯愛客載酒呼  
船浪泊泊孟婆跋扈作餘寒玉簫吹過曲闌下東陵

坐。下。三。青。鳥。女。兒。破。顏。釧。窩。小。繁。華。瞥。眼。徒。紛。紜。羊  
一踏穿阿麼墳隔江山映殘梅晚招之不來殊偃蹇  
不人勸客為樂方陳郎叩然發老狂高子哦詩妙五  
字云魚出聽燈在水風花上已連清明有約更賦麗

人行原注此詩在祝  
荔山席上作

澤州陳說巖相國廷敬詩情超越筆無纖塵有聞笛  
詩云一片長安秋月明誰吹玉笛夜多情關山萬古  
無消息腸斷風前入破聲

聖廟幸海子捕魚賜羣臣命賦詩初白老人時為編



修僕奉內庭詩云笠簷篔簹袂平生夢臣本烟波一釣徒稱

旨內侍傳烟波釣徒查翰林蓋同時有澹遠學士也劉廷璣云可與春城無處不飛花韓翃同一佳話

趙秋谷贊善被放後縱情詩酒客津門時著有海漚小譜朱竹垞有句云間教花底安棋局笑此紅兒狎

酒人時竹垞亦居林下築室曰娛老軒趙則可云老為鶯脰漁翁長間上鷗尾估客船具見兩人之高致

宋牧仲中丞家居嘗命作蘇子瞻像輒貌已待其側

後筮仕竟得黃州通守詩名振天下其論咏物詩一

段甚佳略曰邵青門長蘅以詠物詩最難即少陵咏

物亦非至處余云咏物有二種一種州畫如畫家小

李將軍則李義山鄭谷曹唐是也一種寫意工者頗

多要以少陵為正宗必如青門言咏物非少陵至處

豈房兵曹馬蕃劍螢火諸什猶有所不足乎青門又

云畫鷹一首句句是畫鷹杜之佳處不在此所謂詩

不必太賅切也予於此下一轉語當在切與不切之

間又針塘顧啟姬者鄂幼輿室人也能詩在京師有

花憐昨夜雨。茶憶故山泉。句一日幼輿遠道訪牧  
仲牧仲贈以詩曰閨中有高咏。茶憶故山泉。似此驚  
人句。難爲贈婦篇。畫眉君暫輟。下榻我相延。賦就滕  
王閣。靈風促轉船。

周櫟園曰朱竹初但求之楮穎間頃過劍津西山數  
頃琅玕丹如火齊乃知此君亦戲着緋爲賦二詩云  
高情直與晚楓隣。僂舞安知醉有辰。舊族傳爲絳縣  
老。孫枝近作赤城人。瀟湘淚盡終餘血。淇澳花繁不  
是春。曾在龍門河畔立。支離更見麤中身。亂辭桃花

映客醜斜批鶴頂間。青蘿翻新競比紅兒。曲截笛留  
吹赤帝歌。酒醞宜城交未定。冠裁薛縣色全訛。遙看  
巖下爛。爛處或是秋深柏葉多。櫟園在閩著有閩小  
紀極爲該博。并論閩中詩派。明初林子羽高廷禮以  
聲律圓穩爲宗。厥後風流沿襲遂成閩派。謝在杭以  
爲國初有十才子。宏正有鄭善夫而嘉隆之後則鄧  
副使汝高爲之冠。在杭蓋服膺王李已而醉心於王  
百穀風諧調合不染叫囂之習者也。

寧都魏叔子徵君補辛亥六月客揚州病熱下邳張

天樞九度挾一客過魏丰儀甚美不通名次坐定天  
樞揮扇不已魏竊視扇上有登焦山詩滄江如此急  
亂石自中流魏驚賞謂此何人作天樞手指客曰是  
程山公詩也魏取扇卒讀而揖山公曰吾固聞君不  
謂遂至此耶於是恨相見晚并為作一石山房詩序  
長沙朱氏遇吳逆之亂為營兵所掠氏志堅眾莫敢  
犯舟至小孤山投江死其屍逆流三日浮至故居水  
濱夢訴於父母驚起跡之獲其屍得懷間絕句十首  
有云少小伶俜畫閣時詩書曾奉母為師濤聲向夜

悲何急猶記燈前讀楚詞又曰狂帆慘說遇雙孤掩  
袖潜潜淚欲枯葬入江魚浮海去不留羞塚在姑蘇  
陶式南筆獵所載十首與此小異

烟艸前人無詠之者韓慕廬宗伯掌翰林院事時曾

命門人賦淡芭菰淡芭菰烟艸名見姚旅露書詩多不傳惟慈谿

縣太守為庶常時所作存玉堂集中海寧陳文貞

公有五律四首備錄之神農不及見博物幾曾聞似

吐仙翁火初疑異草薰克腸無滓濁出口有氤氲妙  
趣偏相憶縈喉一朵雲又異種來西域流傳入漢家

醉人無藉酒。欸客未輸茶。葶合名承露。囊應號辟邪。  
聞來頻吐納。攝衛比餐霞。又細管通呼吸。微噓一縷  
烟。味從無味得。情豈有情牽。益氣驅朝霧。清心却晝  
眠。誰知飲食外。別有意中緣。又清氣滌昏。愁精華任  
咀。含吸虛能化。實嘗苦有餘。甘燭火寒能却。長吁意  
似酣。良宵人寂寞。藉爾助高談。

長洲沈碯士編脩德潛著有說詩晬語二卷推論歷

代風雅源流一一抒其心得不襲詩藪卮言之弊其  
自為詩有竹嘯軒歸愚等集專宗三唐文質相麗五

言及樂府尤為擅場有明妃詞云毳帳琵琶曲休彈  
怨恨聲無金酬畫手妾自誤平生嘗鼎一臠未為不  
知味也

秋聲館吟稿一卷仁和符聖幾之恒遺詩也聖幾為

子友藥林從姪學詩於厲徵士樊榭具有宗旨年三  
十三夭卒樊榭序其詩曰澄汰衆慮清思吻冥松寒  
水潔不可近晚誦之信然尤工五言如燭光來樹背  
人語到堂襟艸長橋西路菱枯水上田花寒斜更欽  
香潤斷微生鷗寒依葦立山靜見烟生小橋連野水

虛室貯秋寒。寒烟棲木末。活水齧城根。等句絕似咸平處士。天不永年。未見其止惜哉。

錢塘龔繼武之鏐有過岳墓句云丞相只憑三字獄。

將軍頓廢十年功。又有渡金陵句云潮回大江白日。

落萬山青。西顥嘗為子誦之。尋聞轉客高淳。時有順

義趙丈之璋令其地。余戲謂之曰。縣有邢孟貞其人。

君曷物色之。逾年得書而已。報物故矣。告之西顥相

與恹嘆竟日。

周月東焯天津人。賦詩務極研鍊。不肯苟為雷同著。

有卜硯山房詩一卷。嘗作詠物詩。推敲一字未就。語

人曰。吾為此損眠兩夜矣。其苦吟如此。又嘗待渡河

干時。日已昏暮。孤艇獨橫。傍厓絕無人影。因得句云。

喚船人不應。水應兩三聲。且行且誦。後有同渡者見。

之。匿笑。月東微兀自喜。夷然不顧。里中人爭傳述之。

王正國一名愛國。號桂宮居士。金陵人。國初為朝

天宮道士。善畫。有吳小仙筆意。好飲。求畫者多以酒

飲之。醉輒作畫。立盡數十紙。嘗於鄰屋白板上。就木

節作晴畫。一龍去。一夕大風雨。板上龍已失所在。木

節。空。洞。如。鑿。凡。所。繪。龍。一。時。俱。成。素。幅。後。以。患。痢。死。  
遺。矢。治。痢。如。神。人。謂。其。仙。去。矣。吳。東。壁。爲。作。王。道。士。  
畫。龍。歌。朝。天。宮。裡。老。居。士。曾。走。方。壺。探。弱。水。收。拾。靈。  
怪。入。筆。端。先。學。小。仙。後。道。子。等。閒。不。肯。輕。揮。毫。不。稱。  
神。畫。稱。酒。豪。求。畫。定。載。一。石。酒。一。斟。一。酌。心。陶。陶。酒。  
酣。興。發。重。引。滿。左。執。酒。杯。右。執。管。千。紙。萬。紙。項。刻。成。  
牛。鬼。蛇。神。恣。怪。誕。落。筆。好。寫。蛟。龍。圖。騰。身。時。作。龍。躍。  
躍。神。來。拂。紙。一。揮。霍。筆。勢。早。已。凌。雲。衢。東。鄰。老。翁。冬。  
作。屋。四。壁。白。板。新。斬。木。板。間。雙。節。點。漆。圓。炯。炯。有。光。

若。張。目。居。士。就。目。作。龍。形。攫。拏。天。矯。龍。如。生。神。屋。時。  
時。作。雲。氣。爪。牙。鱗。角。生。光。明。一。朝。風。雨。晚。大。作。雷。轟。  
電。掣。火。欲。灼。雨。止。已。失。龍。所。在。眼。眶。空。洞。如。椎。鑿。一。  
時。畫。龍。俱。無。存。素。幅。不。見。筆。墨。痕。當。是。乘。雲。各。飛。去。  
成。羣。引。隊。翔。天。門。自。古。畫。龍。誇。神。助。葉。公。泯。沒。僧。繇。  
著。葉。公。畫。龍。龍。飛。來。僧。繇。畫。龍。龍。飛。去。畫。龍。龍。來。龍。  
笑。人。畫。龍。龍。去。龍。乃。真。真。龍。卽。在。三。寸。管。取。多。用。宏。  
推。通。神。居。士。畫。不。恃。烘。染。妙。技。肯。爲。古。人。掩。精。神。疑。  
聚。生。色。相。睛。自。能。飛。何。待。點。居。士。本。是。神。仙。宗。畫。圖。

偶爾留遺踪仙蹤渺渺不可卽吾知居士其猶龍詩

載東壁金齋集

蓮坡詩話終

